

busdam deseruntur, cum ea nos ostendunt Christianos quæ patimur, ad exemplum ipsius CHRISTI. Ex nobis, inquit, prodierunt, sed non fuerunt ex nobis. Si fuissent ex nobis, permansissent utiq; nobiscum. Quin potius memores simus tam dominicarum pronuntiationum, quàm apostolicarum literarum, quæ nobis & futuras hæreses prænuñciauerunt, & fugiendas præfinierunt: ut sicut esse illas non expauescimus, ita & posse id propter quod fugiendæ sunt non miremur. Instruit dominus multos esse uenturos sub pellibus ouium, rapaces lupos. Quæ nam istæ sunt pelles ouium, nisi nominis Christiani extrinsecus superficies? Qui lupi rapaces, nisi sensus & spiritus subdoli, ad infestandum gregem CHRISTI intrinsecus delitescens? Qui pseudoprophetae sunt, nisi falsi prædicatores? Qui pseudoapostoli, nisi adukeri euangelizatores? Qui antichristi interim & semper, nisi CHRISTI rebelles? Hoc erunt hæreses non minus doctrinarum peruersitate ecclesiam lacescentes, quàm tunc antichristus persecutionum atrocitate persequetur: nisi quod persecutio & martyres facit, Hæreses apostatas tantum. Et ideo hæreses quoq; oportebat esse, ut probabiles quicq; manifestarentur: tam qui in persecutionibus steterint, quàm qui ad hæreses non exorbitauerunt. Neq; enim eos probatos intelligi \* iuuat, qui in hæresim fidem demutant. Sicut ex diuerso sibi interpretantur, quia dixit alibi: Omnia examine, quod bonum est tenete. Quasi non liceat omnibus male examinatis iniectioe alicuius mali impingere per errorem. Porro si dissensiones & schismata increpat, quæ sine dubio mala sunt, & incontinenti, hæreses subiungit: quod malis adiungat malum utiq; profitetur, & quidem maius: cum idem credidisse se dicat, de schismatibus & dissensionibus: quia sciret etiam hæreses oportere esse. Ostendit enim grauioris mali despectu de leuioribus se facile credidisse: certe non ut ideo de malis crediderit, quia hæreses bonæ essent, sed uti de peioris quoq; notæ tentationibus præmoneret non esse mirandum, quasi diceret tendere ad probabiles quosq; manifestandos, scilicet quos non potuerint deprauare. Deniq; si totum capitulum ad unitatem continendam, & separationes coerendas aptes: hæreses uero non minus ab unitate diuellunt, quàm schismata & dissensiones, sine dubio & hæreses in ea conditione reprehensionis constituit, in qua & schismata & dissensiones. Ac per hoc non eos probabiles facit, qui in hæreses diuerterint, cum maxime diuertere ab eiusmodi obiurgans, & docens unum omnes loqui, & ipsum sapere: quod etiam hæreses non sinunt. Nec diutius de isto, si idem & Paulus, qui & alibi hæreses inter carnalia crimina enumerat, scribens ad Galatas: Et qui Tito suggerit hominem hæreticum, post primam correptionem recusandum, quod peruersus sit eiusmodi & delinquat, ut à semetipso damnatus. Sed & in omni penè epistola de adulterinis doctrinis fugiendis inculcans hæreses taxat: quarum opera sunt adulteræ doctrinæ, hæreses dictæ Græca uoce ex interpretatione electionis, qua quis siue ad instituē

Als \* iuuat.

Hæreses.

ad instituē